

04/04/2002

800 anggota ATM, Polis sertai persembahan Tatu

KUALA LUMPUR, Rabu - Kira-kira 800 anggota tentera dan polis dijangka menyertai persembahan Tatu dan Pancaragam Gabungan Angkatan Tentera Malaysia (ATM) dan Polis Diraja Malaysia (PDRM), hujung minggu ini.

Panglima Angkatan Tentera, Tan Sri Mohd Zahidi Zainuddin, berkata persembahan tatu pada 5 dan 6 April ini juga akan disertai pancaragam tentera dan polis Singapura dan Brunei.

"Tujuan utama persembahan itu adalah bagi menyambut seruan Perdana Menteri Datuk Seri Dr Mahathir Mohamad untuk menambah dana perwira dan pertahanan negara," katanya pada sidang akhbar di sini, hari ini.

Sebelum itu, beliau menerima cek sumbangan Pengurus Besar Pernama, Datuk Abdul Wahab Khalil dan Eksekutif Pemasaran BAE System, Martin J Chandler, semuanya bernilai RM75,000.

Persembahan Tatu dan Pancaragam Gabungan itu akan diadakan di Stadium Nasional Bukit Jalil dan dijangka menerima kutipan sebanyak RM1.5 juta.

Sumbangan itu bagi mengisi Tabung Amanah Perwira dan Pertahanan Negara (TAPPN). TAPPN diwujudkan sebagai manifestasi penghargaan kerajaan bagi mengenang jasa dan bakti serta sumbangan pasukan keselamatan terhadap negara.

Tabung yang dipengerusikan Dr Mahathir bertujuan membantu tentera, polis dan orang awam seperti Rela, Jabatan Pertahanan Awam, Rukun Tetangga, Kastam, Imigresen dan Unit Pencegah Penyeludupan yang terkorban atau cedera ketika menjalankan tugas.

Selain itu, artis terkenal seperti Siti Nurhaliza, Tan Sri S M Salim dan Intan Sarafina akan mengadakan persembahan pada kedua-dua malam itu.

Pada acara itu, penonton juga akan dihiburkan pertunjukan gimnastik dan kawad senyap oleh ATM dan polis.

"Persembahan akan bermula jam 7.30 malam dan tiket boleh didapati di Muzium ATM dan PDRM, Stesyen LRT, ruang legar Wisma Pertahanan, Stadium Nasional Bukit Jalil serta balai polis di sekitar Lembah Klang," katanya.

Tiket-tiket berharga RM10 bagi orang dewasa, RM5 dan RM2 untuk murid sekolah menengah serta sekolah rendah boleh diperoleh di Muzium Polis dan ATM; Kedai Pernama dan Ibu Pejabat Polis Daerah sekitar Lembah Klang serta kaunter LRT STAR dan Stadium Bukit Jalil.

(END)